

# Powšitkowne WOZJEWJENJA

njedźelu, 30. měrca 2025

## Putnikowanje swójbow

Putnikowanje swójbow do Róžanta budže zaso pjatu póstnu njedźelu, lětsa je to 6. apryla. Boža mša w hnadownej cyrkwi zahaji so w 9.00 hodź.

## Kopija ikony swjateho křiža w serbskich wosadach

Znamjo Drježdžansko-Mišnjanskeho biskopstwa za Swjate lěto, kopija ikony swjateho křiža Assisiskeje cyrkwy w San Damiano, budže po serbskich wosadach pućować. To zahaji so w nocy wujednanja w Róžeńčanskej swjatnicy sobotu, 29. měrca, a skónči so pjatu póstnu njedźelu, 6. apryla, z putnikowanjom swójbow na samsnym městnje. Wosadam je přewostajene, kak tute přebywanje wuhotuja, na příklad z nyšporom, kemšemi abo modlerskej hodžinu. Sćěhowace stacije su předwidzane:

<b>sobotu, 29. měrca</b>	Nóc wujednanja w Róžeńće
<b>njedźelu, 30. měrca</b>	dopołdnja w Ralbicach (Boža mša) popołdnu w Kulowje (nyšpor)
<b>póndźelu, 31. měrca</b>	w Njebjelčicach
<b>wutoru, 1. apryla</b>	dopołdnja we Wotrowje popołdnu / wječor w Budyšinje
<b>srjedu, 2. apryla</b>	dopołdnja w klóštrje Marijinej hwězdze w Pančicach-Kukowje popołdnu w Chróscicach
<b>štwórtk, 3. apryla</b>	w Baćonju
<b>pjatk, 4. apryla</b>	w Radworju (w Zdžeri njebudže)
<b>sobotu, 5. apryla</b>	w Róžeńće (Boža mša we 8.00 hodź), zwostanje tam
<b>njedźelu, 6. apryla</b>	w Róžeńće – putnikowanje swójbow ze serbskich wosadow

## „Hodžinka před Bohom“ w Njebjelčicach

Njebjelčanski młodžinski chór wuhotuje sobotu, 12. apryla, w 20.00 hodź. w tamnišim Božim domje „Hodžinku před Bohom“ pod hesłom „Žórto nadžije leži w Bohu“. Na pěsnje, psalmy a modlitwy słuchajo su wšitcy přeprošeni, před Bohom wutrac a so dušinje na jutry přihotować.

## Serbske kemše w Drježdžanach

Drježdžanscy Serbja – wosebje tež młodži – su na maćernorěčnu Božu mšu njedźelu, 6. apryla, w 16.00 hodź. do cyrkwy swjateho Antonija na Bünauskej 10 přeprošeni. Přizamknje so bjesada ze swaćinu.

## Instalacija „Stwórba“ k měščanskemu jubilejej

Spirituelnu instalaciju zwukow a swěcy „Stwórba“ předstaja hišće hač do pjatka, 4. apryla, w Kamjenskeje katolskej cyrkwi swjateje Marije Madleny. Boži dom je wot póndžele do pjatka wot 9.00 do 12.00 kaž tež wot 15.00 do 19.00 hodź. přistupny.

## Příležitost k swjatej spowědži w Róžeńce

**sobotu, 5. apryla**  
17.00 – 18.00 hodž.

farar M. Anders, kanonik Š. Delan  
farar B. Jakubaš, kanonik dr. B. Dittrich

**sobotu, 12. apryla**  
17.00 – 18.00 hodž.

farar M. Anders, kanonik Š. Delan  
farar B. Jakubaš, farar M. Kocner

**wutoru, 15. apryla**  
18.30 – 19.30 hodž.

farar M. Anders, farar G. Wornar,  
farar G. Nawka, pater J. Müller

Kóždu sobotu do Božeje mše za lud a kraj, kotraž so we 8.00 hodž. započina, je příležitost k swjatej spowědži.

### „Nóc bibliotekow“ tež w Serbskim insituće

Serbska centralna biblioteka (SCB) wobdžěli so přěni raz na cyłoněmskej „Nocy bibliotekow“. Wona wotměje so pjatk, 4. apryla, wot 18.00 hodž. pod motom „Wědu dźělić a sej wotkryć“ („Wissen.Teilen.Entdecken“) w Serbskim insituće na Dwórnišćowej 6 w Budyšinje. Hnydom we 18.00 hodž. wotewrja tam kabinetnu wustajeńcu k dźěławosći nakładnistwa Lusatia. Dale předstaji dr. Robert Lorenc Mukowu „Statistiku lužiskich Serbow“ z lěta 1886 (w němskej rěči). Sćěhujaj krótke a zabawne čitanja powědkow, krimijow a lyriki, překi a podłu našich wobstatkow, w serbskimaj rěčomaj a němsce. Čitaja Madleńka Šoćic, Měrćin Wjenk, Anja Pohončowa a Měrana Cušcyna. W sydarni předstaji młode towarstwo Serbska murja swoje wideja k serbskim stawiznam a přeprošuje zajimcow so w hrě „QuizSerb“ wubědźować.

### Wječorne modlenje w Kulowje

Poslednje wječorne modlenje dekanatneje młodžiny w póstnym času budže sobotu, 5. apryla, w Kulowje. Započatk je 20.00 hodž.

### Křižowy puć dekanatneje młodžiny

Křižowy puć modli so dekanatna młodžina bołmončku, 13. apryla, w Nuknicy. Započatk je w 14.00 hodž.



### Putnikowanje młodostnych do Roma

Bamž Franciskus je wšitkich młodostnych na tydzeń młodžiny do Roma přeprósyl. Tón ma so w formaće swětowego zetkanja młodžiny wotměć, to rěka zwiski nawjazać a so zhromadnje modlić. Młodostni su přeprošeni so na putnikowanju z biskopom Heinrichom Timmereversom wot wutory, 29. julija, do pónđzele, 4. awgusta, wobdžělić. Nimo Roma je Assisi jedna ze stacijow. Zajimcy měli so online přizjewić. Link k tomu kaž tež nadrobny program nańdu pod [www.posol.de](http://www.posol.de).

### Zawod do tematiki lětušich nabožnych prózdnišćich dnjow

Drježdžansko-Mišnjanske biskopstwo poskičuje tež lětsa zaso zawod do tematiki nabožnych prózdnišćich dnjow. Přěnje tajke zarjadowanje budže pónđzela, 28. apryla, wot 18.00 do 21.00 hodž. na Budyskej farje. Dalše zarjadowanja su po wutorach, 29. apryla w Kamjenicy, 13. meje w Lipsku a 27. meje w Drježdžanach planowane. Zdobom poskića zamołwići zawod tež online, a to štwórtk, 15. meje. Přizjewjenja přijimujaj online. Link je pod [www.posol.de](http://www.posol.de) podaty.

## Rjad filmow a rozmołwow

Hornjołužiske telefonowe dušepastyrstwo přeprašuje na rjad filmow z rozmołwami wo depresiji, k zmištrowanju žarowanja, samotnosći a identiče. Prěni film štwórtk, 10. apryla, we 18.00 hodź. w kinje Budyskeho Kamjentneho doma wěnuje so temje „Wer wir gewesen sein werden“ Ereca Brehmera. Přizamknjetej so wotewrjena rozmołwa a wuměna. Přizjewjenje njeje trěbne. Zastup je darmotny.

## Wustajeńca „Što rěka tu mjeńšina?“

Budyski Serbski muzej wotewrje njedźelu, 6. apryla, w 15.00 hodź. pućowansku wustajeńcu „Što rěka tu mjeńšina? Danojo, Frizojo, Serbja, němscy Sintojo a Romojo a Delnjoněmcy“. W njej wěnuja so prašenjam kaž „Što woznamjenja domizna?“, „Kotru rólu hraje rěč za našu identitu?“ kaž tež „A kak formuje kulturne herbstwo naše zhromadne žiwjenje?“. Pućowanska wustajeńca Mjeńšinoweho sekretariata ma hač do srjedy, 11. junija, składnosć skićić, wšitke štyri awtochtone narodne mjeńšiny a ludowe skupiny Němskeje zeznać – dansku mjeńšinu, němskich Sintow a Romow, serbski lud a frizisku ludowu skupinu. Tež rěčna skupina delnjoněmčina je do wustajeńcy zapřijata. „Eksponaty skića wosobinske dohlady do žiwjenja tutej skupin a pohnuwaja k tomu, wo přisłušnosći a kulturnej identiče rozmyslować. Wustajeńca wotwěra nowe perspektiwu na towaršnostnu zhromadnosć, wuznam rěče a wšelakorosć našeje towaršnosće. Wona k tomu přeprašuje so prašeć, hač zwučene zhladowanja přitřechja a wotewrjenje a wćipnje dialog zahajić“, pisa Mjeńšinowy sekretariat w zdźěleńce. Wón bu 2005 založeny a zastupuje zajimy připóznatych narodnych mjeńšin w Němskej, spěchuje wuměnu mjez nimi a ze zwjazkowym knježerstwom. Wšitcy su na wotewrjenje přeprašeni.

## Křižowy puć w Jiřetínje pod Jedlovou

Na rozpominanje křižoweho puća z tekstami českeho basnika Milana Hrabala su wěriwi a zajimcy wulki pjatk, 18. apryla, w 15.30 hodź. do českeho Jiřetína pod Jedlovou njedaloko Varnsdorfa přeprašeni. Milan Hrabal a Martin Louka přednjesetaj teksty tež w serbskej rěči. Wšitcy su wutrobnje přeprašeni.

## Prewentiwne kubłanje na polu wotwobaranja seksualizowaneje namocy

Wotwobarać seksualizowanu namóc je wažny wobstatk džěla z džěćimi a młodžinu we wosadach. Zaměr je, nowu kulturu wzajemneje zhromadnosće wuwijać. Za to su prewentiwne struktury a procesy trěbne. Worklečanske dekanatne dušepastyrstwo za džěći a młodžinu poskićuje k tutej temje kubłani po pónđzelomaj 19. meje na Ralbičanskim „Radlubinje“ a 2. junija we Worklečanskim Don Boskowym domje, stajnje wot 18.00 do 21.00 hodź. Wšitcy pomocnicy na nabožnych prózdninskich dnjach we wosadach, ale tež dalši čestnohamtscy, kotřiž maja tam zwisk z džěćimi a młodostnymi, na přikład w sakristiji abo ze šolu, su na jedne ze zarjadowanjaw wutrobnje přeprašeni. Ličba městnow je wobmjezowana. Přizjewjenja přijimaja so jenož online. Link k tomu kaž tež k dalšim wažnym informacijam je pod [www.posol.de](http://www.posol.de) wozjewjeny.

*Sabina Lanzyna, referentka za pastoralku džěći*

## Gospelowy koncert z nimale tysac hłosow sylnym chórom

Finale najwjetšeho mjezynarodneho gospeloweho festiwala w srjedźnej Němskej wotměje so njedźelu, 6. apryla, w 17.00 hodź. w Zwickauserkej měščanskej hali. Na nim budže nimale 1.000 hłosow sylny chór spěwać. Carmen a Friedemann Wutzler, kotraž staj so zašće lěta tež za zhromadny džěćacy chór Drježdžansko-Mišnjanskeho a Zhorjelskeho biskopstwa angažowałoj, staj koncert sobu iniciěrowałoj. Zastupne lisćiki za sylnje křesćansce charakterizowany koncert hodža so online pod [www.posol.de](http://www.posol.de) skazać.